

四庫全書

集部

欽定四庫全書

集部
宋元詩會卷十九

詳校官中書_臣陸湘

主事銜_臣徐以坤覆勘

總校官知縣_臣繆琪

校對官中書_臣牛稔文

謄錄監生_臣錢萬卷

欽定四庫全書

宋元詩會卷九

兵部主事陳焯編

邵雍

字堯夫其先范陽人徙共城年二十遊河南葬其
觀伊水上遂為河南人雍少時自雄其才欲樹功
名于書無所不讀長而涉歷四方久之幡然來歸
曰道在是矣事共城令李之才受河圖洛書及六
十四卦圖象妙悟神契洞澈蘊奧及其學益老德
益邵玩心高明以觀天地之運化觸類深通著書
十萬言囊括三才夔絕今古河南程顥聞其論議
退而歎曰內聖外王之業也雍知慮過人遇事能

前知伊川曰其心虛明自能知之當時學者高其所為謂于凡物聲氣之所感輒能推動極變于是撫事之已然者皆以雍言先之雍盖未必爾也嘉祐中舉逸士屢授職皆不之官卒年六十七贈秘書省著作郎賜諡康節先生

鳳州郡樓上書所見

楊柳垂青青風動如飛盖危樓思不窮盡日間相對鳥去林自空雲移山不礙畫角時斷續層崖遯明晦殘陽挂雙虹遠水生微瀨久客屬東望意與孤鴻會

天津幽居

予家洛城裏況復在天津日近先知曉天低易得春時
光優化國景物厚幽人自可輕軒冕閒中老此身

閒吟

平生雖不仕隨分亦風波所損無紀極曰歸仍蹉跎既
乖經世志尚可全天和樽中時有酒且飲行復歌

秋懷 二首

晴牕日初曛幽庭雨乍洗紅藥靜自披綠竹閒相倚榮
利浮若雲懷情淡如水身非天外人意從天外起

斷續蟬聲外，稀疎雁影前。年光空逝矣，人事亦蕭然。洗竹留新筍，翻書得舊編。誰知養心者，肯與世爭權。

秋夜

浮雲一消散，星斗燦長天。碧蘚墜丹果，清香生白蓮。體涼猶衣葛，耳靜已無蟬。坐久羣動息，秋空惟寂然。

和張二少卿丈白菊

籬下曉凝霜，疎枝殿顚商。自知能潔白，誰念獨芬芳。豈為瓊無艷，還驚雪有香。素英浮玉液，一色混瑤觴。

登朝元閣

繡嶺岌層巒
峩十九盤
霏微輕雨後
杳靄出雲端
往事金輿邈
遺踪玉像殘
至今臨渭水
依舊見長安

閒行

園圃正蕭然
行吟遶澤邊
風驚初社後
葉墜未霜前
衰草襯斜日
暮雲扶遠天
何當溯真趣
止可入無言

天津閒步

天子舊神州
蔥蔥氣象浮
園林閒近水
殿閣遠橫秋
浪

雪暑猶在橋虹晴不收人間無事日此地好淹留

依韻和王不疑少卿招飲

經難憶浮丘吾鄉足勝遊風前驚白髮雨後快新秋仕
宦情雖薄登臨興未休人間憂喜事都不到心頭

小圃逢春

隨分亭欄亦弄妍不妨閒傍酒鑪邊夜簷靜透花間月
晝戶晴生竹外烟事到悟來同偶爾天教閒去豈徒然
壺中日月長多少爛占風光十二年

芳草短吟

花間水畔綠如茵興廢曾經漢與秦
占斷山川無限地愁傷今古幾何人
嚴霜殺盡還逢雨野火燒殘又遇春
不那路傍多此物王孫歸去苦迷津

謝富丞相招出仕

欲遂終焉閒老計未知天意果如何
幾重軒冕酬身貴得似雲山到眼多
好景未嘗無嘯詠壯心都已入消磨
鷓鴣自有江湖樂安用區區設網羅

秋遊

七月芙蓉正爛開東南園近日徘徊有時風向池心過
無限香從水面來罨畫溪深方誤入洞庭湖晚未成迴
坐來一霎蕭蕭雨又送清涼到酒盃

後園即事

太平身老復何憂景愛家園自在遊幾樹綠楊陰乍合
數聲幽鳥語方休竹侵舊徑高低迸水滿春渠左右流
借問主人何所樂答云殊不異封侯

春遊

洛陽春色浩無涯
況此城東景復嘉
風力緩搖千樹柳
烟光輕盪半川花
天晴翡翠飛平岸
日暖鴛鴦下淺沙
不見君王西幸久
遊人但感鬢空華

十四日留題福昌縣宇之東軒

洛川秋入景猶嘉
微雨初過徑路斜
水竹洞中藏縣宇
烟嵐塢裏住人家
霜餘紅間千重葉
天外晴排數縷霞
溪淺溪深清漱瀨
峯高峯下碧查牙
鳥因擇木飛還遠

雲為無心去更賒蓋世功名多齟齬出羣才業足咨嗟
浮生日月仍須惜半老筋骸莫強誇就此巖邊宜築室
樂吾真樂趣無涯

天津感事

自古別都多隙地參天喬木亂昏鴉荒垣壞堵人畊處
半是前朝卿相家

謝君實端明惠牡丹

霜臺何處得奇葩分送天津小隱家初訝山妻忽驚走

尋常只慣插葵花

二色桃

施朱施粉色俱好
傾國傾城艷不同
疑是藥宮雙姊妹
一時俱肯嫁春風

天津感事

鳳樓深處鎖雲烟
一鎖雲烟又百年
痛惜汾陰西祀後
翠華辜負上陽天

春日登石閣

滿洛城中將相家
廣栽桃李作生涯
年年二月凭高處
不見人家只見花

春暮吟

有意揚花空學雪
無情榆莢漫堆錢
窮愁不服春辜負
酒病依還似去年

和富公

道堂閒話儘多時
塵外杯觴不亂飛
初上小車人已識
醉和風雨夜深歸

謝濤

陽夏人其父懿文為鹽官令華富陽遂為富陽人
濤以文行稱舉進士為梓州榷鹽院判官以平李
順論功遷觀察推官知華陽縣改祕書省著作佐
郎知興國軍改知曹州進直昭文館累官至太子
賓客

讀史

百年奇特幾張紙千古英雄一窖塵惟有炳然周孔在
至今遺澤浸生民

司馬池

字和中晉安平獻王孚之後其祖有葬安邑者遂
為夏縣人舉進士當試殿廷聞母病號痛而歸後
中第授永寧主簿由郾縣尉調鄭州防禦判官知
光山縣用威度薦改著作佐郎監安豐酒稅徙知
小溪縣歲餘為郡收判官忤內侍皇甫繼明罷知
耀州擢利州轉運使知鳳翔府召知諫院懇辭不
拜加直史館復知鳳翔累遷兵部員外郎兼
侍御史知雜事出典州郡長子旦次子光

行色

冷於陂水澹於秋遠陌初窮見渡頭賴得丹青無畫處
畫成應遣一生愁

陶弼

字商翁永州人少儻放宕吳中行山間有雙鯉
戲溪水上弼佇觀之旁有老父顧曰此龍也行且
闕君當亟去去百步許雷大震而兩岸圯矣丁謂
一見妻以宗女因從學兵法慶歷中揚旼討湖南
瑤弼上謁授之兵使往襲力破之以功得陽朔主
簿懷賊犯南海弼為安撫使參謀累擢知賓容欽
三州換崇儀使知邕州綏輯惠養邊境大治徙鼎
州辰州轉康州團練使晚知順州弼久於南荒思
咸並著終弼之世交人無敢犯邊者加
東上閣門使未拜而卒有詩集行世

兵器

五代乏真主奸雄紛僭偽橫磨濶刀劍白日相篡弑我
宋皇太祖潛德動天意神物既有歸乃即皇帝位不惠

兆民樂不怒諸侯畏顛倒執玉帛奔走恐後至獨有陰
山魁時時思畧地天子赫斯怒大警巡澶衛射却大當
戶遂斷撐犁臂狼心帖然服結好同昆弟卒閒喜夜歌
將老貪春睡自此為太平恍逾三十歲元昊乘我間南
馳賀蘭騎陽關久夜開樞朽不可閉陣雲起秦雍殺氣
橫涇渭使臣股慄奏宰相嗔目議僉曰亟發兵豎子坑
甚易倉皇築邊壘未戰力先瘁逼邊開庫兵土蝕鋒銑
脆防秋採舊屯推轂謀新寄舊屯老且死少者無實藝

良由不訓練手足迷擊刺新寄將家子從小生富貴六
韜未嘗讀口但知肉味師復從中御進退由閤寺權輕
號令冗兩戰無遺類曹公棄七軍晉人獲三帥吾兵自
此喪有詔新其製此器不預設一旦何從致朝廷急郡
縣郡縣急官吏官吏無他術下責蚩蚩輩耕牛拔筋角
飛鳥禿翎翅斡截會稽空鐵烹堇山悴供億稍後期鞭
扑異他罪愁氛擁太虛霽景晝冥晦我聞郭汾陽料敵
多奇異單筆論堅壘羅拜膝雙墜又聞李西平臨戎有

英氣身著紅錦袍懷光肝膽碎是知用兵術在人不在
器君耳舜高聽君目舜明視願採謀畧長勿倚干戈銳
送趙樞寺丞宰虔化縣

路入虔雲去如何輕解攜人烟五嶺北星斗大江西暖
雪梅花樹晴雷贛石溪青衫欲無淚不奈鷓鴣啼

出嶺題石灰鋪

馬渡嚴關口生歸喜復嗟天文離卷舌人影背含沙江
勢一再曲梅梢三四花登高休問路雲際是吾家

東湖

寧越佳山水東湖帶郡城月天高寺影春雨一橋聲石
上清蒲合沙中白鳥橫天涯正寥落獨往若為情

西湖

寧越佳山水西湖似浙城桂多天竺子潮欠海門聲路
向林梢轉天隨野色橫從茲棲泊者無復渡江情

題霞溪驛

全州

歌聲野色中人樂歲時豐暑雨陰陽雜秋田蚤晚同嶺

雲無烈日江樹足涼風自指香山語前村有路通

登崑崙臺

落照古城隅邊風動隼旗久閒忘戰畧多病熟醫書白
髮隨年短新情與世疎桃花春水起還釣舊溪魚

起一作暖

秋日登南城臺

江國家書少秋臺寒草生無人來遠渡盡日上高城落
照縣漁市孤烟起戍營東籬故園菊又向酒中傾

過思明

幾年來瘴外此夜宿溪中照枕殘雞月吹燈落葉風盧
循猶偽國楊僕已衰翁起戴寒星去村前燒影紅

題陽朔縣舍

石壁高深遠縣衙不離牀衽自烟霞民耕紫芋為朝食
僧煮黃精代晚茶瀑布聲中窺案牘女蘿陰裏勸桑麻
欲知言偃絃歌化水墨屏風數百家

皂閣

萬仞天然皂閣形陰陽不似衆山青一區海上神仙宅

數曲人間水墨屏
華表鶴歸春谷響
玉京龍起夜潭腥
可憐張葛無人繼
三級高壇拂杳冥

天涯亭

雨色絲絲風色驕
天涯亭上覺魂銷
一家生意付秋瘴
萬里歸心隨暮潮
兵送遠人還海界
吏申遷客入津橋
山公對此聊酣飲
怕見醒來兩鬢凋

對花有感

得意欣欣失意悲
古今人事若花枝
桃紅李白薔薇紫

問著春風自不知

尹洙

字師魯河南人少與兄源俱以文學知名舉進士
調正平縣主簿歷知光澤縣改伊陽縣有能名用
太臣薦召試為館閣校勘會范仲淹貶洙上奏以
爲免朋黨爲恥落職知康州酒稅趙元昊反朝廷
以范仲淹韓琦爲副安撫使復以洙爲判官進集
賢校理未幾韓琦知秦州辟洙通判州事上書極
言時政得失仁宗嘉納之改太常丞知涇州尋以
右司諫知渭州兼領涇原路經畧公事會總管鄭
戢欲城水洛洙力爭謂不可爲戢所中徙慶州董
士廉復上書訟洙御史劉湜文致其罪再貶崇信
軍節度副使徙監筠州酒稅未至
而卒年四十七有集二十七卷

皇雅

十首

天監受命也自梁至於周兵難不息宋受命統一

萬方焉

天監下民亂靡有定甚武且仁祚厥真聖仁實懷徠武
以執競匪虔匪劉拯我大命自昔外禪月經日營今以
挾制政以陰傾帝初治兵志勤于征奄受神器匪謀而
成淮路弗虔卒汙叛迹戎輅戒嚴皇威有赫彼寇誅民
吾勇其百殄厥渠魁貸其反側帝朝法宮左右宗公攸

夫悍士以雍以容爾居爾室爾工爾農既息既養惟天子功

西師征蜀也

王用西師岷梁弗賓匪曰負固實交晉人予訓予誓合
我將臣正厥有罪無庸傷民矯矯虎士載摧其壁于嗟
孟侯亦果其策迎師而降靡抗鋒鏑豈獨身謀完是宗
國蜀都既平將臣失律此衆悍驕彼民危慄當塗叫呶
合萬為一匪懷則威帝心是恤帝曰將臣予嘉乃庸廢

命毒民爾弗有終邦典用疑惟罪惟功靡殛而削協于
厥中帝曰孟侯受封于楚旂旂珣玁戈備物異數俾爾族
姻及乃文武服在王庭靡不有序蜀民呼歌天子威靈
保我者封暴我者刑匪功是和匪弱是陵天子惠民疇
敢不承

者武受俘也命將伐南海平金陵俘二王以獻
者武定功時惟二方淮服其義海南遂荒孰孱而韞孰
暴而猖自底不諛乃終滅亡帝戒二俘同即爾誅予惟

民無辜休息是圖時其輯矣寧威獨夫帝嗟汙邦久罹
于兵或暴下以征或敷虐以刑予命中典協于國經民
服德音室家以寧

憲古令守臣也削其附庸以強帝室焉

帝懷永圖治古是憲四方守臣惟屏惟翰在昔艱難弗
惠訓典跨都連城高牙以建有土有民肆乃征繕以息
以容終焉叛渙凡今帥臣狃厥聞見匪革亂原曷清多
難帝告庶邦式是典彝元侯顯父戚臣宗支正乃封圻

予一人是毗凡曰附城罔爾俾之畜兵厚賦靡爾得私
毋凶而國作福作威天子有命疇敢不祇子孫承承唯
萬世規

大鹵王師討晉罪也

冀州之疆粵惟大鹵

地晉

俗忤而專地扼而固協比幽都

蕩搖邊圉三垂既摧兇威弗沮帝御六師百萬貔虎剪
其附庸至于城下鋒鏑始交梯衝如舞螽爾孱王請附
降土我士奮揚願究吾武皇帝曰吁念彼黎庶匪鯨匪

鯢復為王士晉郊既平九區以寧陳功太廟告假威靈
在昔武王于商觀兵惟我藝祖亦勤于征匪貸晉罪俟
厥貫盈聖作聖繼巍巍相承皇矣二后功莫與京

帝籍修故典也躬耕以勸農焉

帝籍于郊典儀具陳務農以訓供祀以勤祀在于誠匪
勤于人訓農以實匪訓以文帝謹二物乃躬乃親公侯
卿士暨庶民千旬有制飭哉惟寅帝賡高年式宴且
喜種種黃髮族丘而議我生艱難暴亂以繼耳狃金鼓

目狎戎器皇其我圖親講農事有子有孫力田孝悌鼓舞至仁薰焉如醉

庶工任賢也

帝咨庶工疇其輔予俊乂以登厥勞乃圖匪忘舊勲非賢勿俞巍巍衮台盛德以居任賢伊何昌言是庸勉告爾猷罔恤廼躬豈無直辭拂于予衷予不爾疵爾無面從始時從官戎容揚揚今帝左右儒冠煌煌朝廷以尊文物典章得人之盛弈世重光

帝制北方請盟也

帝制萬邦罔有弗賓蠢爾化外羈焉勿臣威格三方稽
顙獻珍匪茹革心願交使人帝謀公卿列侯庶校咸曰
彼心暴戾陰狡既擾我疆復利吾寶無若勵兵襲其還
道皇曰有衆予實念茲戰無必勝矧其歸師借曰大獲
疇能盡之益俾餘醜毒吾朔陞乃俞其盟北州以綏在
漢世宗抗威速攻暴農算商經用弗充中區震騷漢南
始空降及後世猶稱厥功於穆聖考德無與偕匪勤于

兵荒服遂來逮是三紀遠俗以懷生民休息嗚呼仁哉
皇治恤刑也帝仁於明刑在位者以寬恤為治焉
皇底其治欽哉惟刑在疑而宥罔察為明愛怒弗肆孰
為重輕毋一弗辜惟典之平前世理官倚法以刻匪彼
為仇蓋曰任職今之蔽獄務正其辟鑒于前人繫我仁
德皇德在仁寢而成風公侯卿士靡不率從羣卵萌生
咸保厥終不鄙不夭樂哉融融

太平封祀告成功也

噫太平無象兮世烏得而知維盛德可迹兮其封祀之
儀東岱宗兮西汾睢禮上帝兮賓地祇皇有征兮吾民
以嬉皇有祈兮吾民是私天敷佑兮俾皇之釐永世億
寧兮無疆之基

孫復

字明復晉州平陽人舉進士不第退居泰山學春秋著尊王發微十二篇年四十不娶宰相李昉知其賢以其弟之子妻之用范仲淹富弼薦除祕省校書郎國子直講出知州縣稍遷殿中丞卒復與胡瑗不合在太學彼此相避瑗治經不如復而教養諸生蓋過之也復弟子石介最知名

蠟燭

六龍西走入崦嵫寂寂華堂漏轉時一寸丹心如見用
便為灰燼亦無辭

石介

字守道兗州奉符人進士及第歷鄆州南京推官
篤學有志尚樂善疾惡遇事敢為丁父母憂耕徂
徕山下魯人號徂徕先生入為國子直講作慶厯
聖德詩為夏竦所深恨出判濮州未赴卒幾有斷
棺之禍賴諸大臣保護得免

慶厯聖德頌

於維慶厯三年三月皇帝龍興徐出闈闥晨坐太極書
開閭闔躬攬賢英手鋤姦桀大聲颯颯震撼六合如乾
之動如雷之發昆蟲踴躍妖怪藏滅同明道初天地嘉
吉初聞皇帝感然言曰予父子祖付予大業予恐失墜
實賴輔弼汝得象殊重慎微密君相予久予嘉君伐君
仍相予笙鏞斯協昌朝儒者學聞皆洽與予論政傳以
經術汝貳二相庶績咸秩惟汝仲淹汝誠予察太后乘
勢湯沸水熱汝時小臣危言業業為予司諫正予門闕

為予京兆聖子讒說賊叛于夏往予式遏六月酷日大
冬積雪汝暑汝寒同於士卒予聞辛酸汝不告之予晚
得弼予心慰悅弼每見予無有私謁以道輔予弼言深
切予不堯舜弼自箴罰諫官一年奏疏滿篋侍從週歲
忠力盡竭北丹亡義擣杞饕餮敢侮大國其辭慢悖弼
將予命不畏不懾卒復舊好民得食褐沙磧萬里死生
一節視弼之膚霜剝風裂觀弼之心鍊金煅鐵寵名大
官以酬勞渴弼辭不受其志莫奪惟仲淹弼一夔一契

天實賚予子其敢忽並來弼予民無瘥札曰衍汝來汝
予黃髮事予二紀毛禿齒豁心如一兮率履弗越遂長
樞府兵政無蹶予蚤識琦琦有奇骨其器魁礪豈視居
櫟其人渾璞不施剗剗可屬大事敦厚如勃琦汝副衍
知人予哲惟修惟靖立朝讞讞言論礪礪忠誠特達祿
微身賤其志不怯嘗詆大臣亟遭貶黜萬里歸來剛氣
不折屢進直言以補予闕素相之後含忠履潔昔為御
史幾叩予榻至今諫疏在于箱匣裏雖小臣名聞于徹

亦嘗獻言箴予之失剛守粹慤與修儔匹並為諫官正色在列予過汝言無鉗汝舌皇帝明聖忠邪辨別舉擢俊良掃除妖魃衆賢之進如茅斯拔大姦之去如距斯脫上倚輔弼司予調燮下賴諫諍維予紀法左右正人無有邪孽予望太平日不逾浹皇帝嗣位二十二年神武不殺其默如淵聖人不測其動以天賞罰在予不失其權恭已南面退姦進賢知賢不易非明不得去邪惟艱惟斷乃克明則不貳斷則不惑既明且斷惟皇之德

羣下踧踖重足屏息交相告語曰惟正直毋作側僻皇
帝汝殛諸侯危慄墮玉失舄交相告語皇帝神明四時
朝覲謹修臣職遠人走馬墜銚遺策交相告語皇帝神
武解兵修貢永為屬國皇帝一舉羣臣懾焉諸侯畏焉
遐荒服焉臣願陛下壽萬千年

汴渠

隋帝荒宴遊厚地剗為溝萬舸東南行四海困橫流義
旗舉晉陽錦帆入揚州揚州竟不返京邑為墟丘吁哉

汴渠水至今病不瘳世言汴水利我為汴水憂利害我
豈知吾試言其由汴水濬且長汴水湍且適千里瀉地
氣萬世勞人謀舳艫相屬進餽運曾無休一人奉口腹
百姓渴膏油民力輸公家斗粟不敢收州侯共王都尺
租不敢留太倉粟戕戕冗兵食無羞上林錢朽貫婪官
求要優吾欲塞汴水吾欲壞官舟請君簡賜予請君節
財求王畿方千里邦國用足周盡省轉運使重封富民
侯天下無移粟一州食一州

贈張績禹功

李唐元和間文人如蟻起李翱與李觀言雄破姦宄孟
郊及張籍詩苦動天地持正不退讓子厚稱絕偉元白
雖小道爭名愈弗已卒能霸斯文昌黎韓夫子吾宋興
國來文人如櫛比黃州才專勝漢公氣全粹晦之號絕
羣平地走虎兕謂之雖馭雜亦文中騏驥白稹洎盧震
江沱自為水朱巖無孫僅培塿對嶽峙卒能霸斯文河
東柳開氏嗟吁河東歿斯文乃屯否泊泊三十年淫哇

滿人耳粵從景祐後大儒復唱始文人如麻立縱縱攢
戰騎徂徠山磊砢生民實頑鄙容貌不動人心膽無有
比不度蹄涔微直欲觸鯨鯢有慕韓愈節有肩柳開志
今讀禹功文矛戟寒相倚寶光千里高飛出破屋裏龍
音萬丈長拔出重淵底雷霆皆藏聲日星皆失次我慙
年老大才力漸衰矣禹功氣奔壯今方二十二前去吾
之年猶有十四歲今讀禹功文魂魄已驚悸更加十四
年世應絕儔類卒能霸斯文吾恐不在已禹功幸勉旃

當仁勿讓爾

過魏東郊

全魏地千里雄大視區宇黃河為血脉太行為筋膂地
靈育聖賢土厚含文武堂堂柳先生生下如猛虎十三
斷賊指聞者皆震怖十七著野史才俊凌遷固二十補
亡書辭深續堯禹六經皆自曉不看注與疏述作慕仲
淹文章肩韓愈下唐二百年先生固獨步投篇動范杲
落筆驚王祐四方交豪傑羣公走聲譽一上中高第數

年編士伍五命為御史連出守方土事業幾臯夔才能
堪相輔鳳皇世不容衆鳥競朝訴獄中饑不死特地生
爪距貌貅十萬師盟津直北渡塞上諸猛將低頭若首
鼠渴憶海為漿饑思鼇為脯兩手擎人肝大牀橫斗肚
一飲酒一石賊來不怕懼帳下立孫吳樽前坐伊呂笑
談韜鈴間出入經綸務

蜀道自勉

潮陽障烟黑去京路八千吏部有大功得罪斥守藩朝

衝江霧行夜枕江濤眠蛟蜃作怪變時時攀船舷魚龍
吐火燄往往出波間故為相恐怖倏忽千萬端道在安
可劫處之自宴然我乏尺寸效月食二萬錢自請西南
來此行非竄遷蜀山險可升蜀路高可緣上無嵐氣蒸
下無波濤翻步覺閣道穩身履劍門安惟懷吏部節不
知蜀道難

感興

村居何所適種木樹桑梓田園繞家舍遠不逾十里歟

段足乘騎代步而已矣但識畜駕駘安知有驥驥臘月
北風寒太行山色紫君命急如火城頭見烽燧雲深馬
僵倒十夫扶不起軍法有明訓後期者誅死倚鞍思駿
骨撫轡念駉駉求之不可得轂觶滿眼淚旁聞負薪叟
竊語相譏刺居安常念危在險如處易臨難始求濟狼
狽徒勞爾有備則無患古人垂深旨平居無事時華廐
深祕遽善穀與豐草秣飼十廐吏駕駘飽相枕素餐不
知愧伯樂能識馬每來加勸說飛兔與騷褭日牽在都

市為愛千金資貪吝不肯置今日臨艱難勞力自勉勵

偶作

晉公平淮西兵出速如神崇韜伐西川六十日請臣太
祖初受命諸侯未盡賓蜀廣號敵國荆潭為彊鄰王師
討有罪不聞逾十旬元昊誠螻蟻有地長一畛詎足污
斧鉞尋當投荆榛是何逾歲月務行含貸仁豈茲將帥
間迥無晉公倫張旗發一號豈無李處耘提戈出一戰
豈無王全斌容茲盈寸蟹蕩漾於流津平生讀詩書胸

中貯經綸薄田四五畝甘心耕耨勤倚鋤西北望涕淚
空沾巾

送李唐病歸

春風汶水溫曉日徂徠寒之子銜病歸請子開一言子
知去病術為子陳大端子嘗學聖人試將道比論道病
非一日善醫惟孔韓賞罰絕于周孔筆誅其姦春秋十
二經王道復全完佛老熾于唐韓刀斷其根原道千餘
言生民復眠餐道病由有弊邪偽容其間身病猶有隙

風邪來相干子欲治斯道絕弊道乃存子欲治子身杜
隙身乃安此理近古醫吾言有本源

麥熟有感

去年經春頻肆赦拜赦人忙走如馬五月不雨麥苗死
赦頻不能活窮寡今年經春無赦書十日一雨及時下
五月麥熟人民飽一麥勝如四度赦吾願吾君與吾相
調和陰陽運元化陰陽無病元氣活風雨調順麥多稼
使麥長熟人不饑肆青空文奚為者

讀詔書

關中有山生虎狼虎狼性殘不可當去歲食人十有一
無辜被此惡物傷守臣具事奏聖帝聖帝讀之惻上意
乃詔天下捕虎狼意欲斯民無枉死吾君仁覆如天地
只知虎狼有牙齒害人不獨在虎狼臣請勿捕捕貪吏
乙亥冬富春先生以老儒醇師居我東齋濟北張
洞明遠楚宮李溫仲淵皆服道就義與介同執
弟子之禮北面受其業因作百八十二言相勉

鳳凰飛來衆鳥隨
神龍遊處羣魚嬉
先生道德如韓孟
四方學者爭奔馳
濟北張洞壯且勇
楚丘李溫少而奇
二子磊落頗驚俗
泰山石介更過之
三人堂堂負英氣
胸中拳拳蟠蛟螭
道可服分身可屈
北面受業尊為師
先生晨起坐堂上
口誦大易春秋辭
洪音琅琅響齒牙
鼓簧孔子興宓義
先生居前三子後
恂恂如在汾河湄
續作六經豈必讓
焉無房杜廊廟資
吁嗟斯文敝已久
天生吾輩同扶持
二子勉旃吾不惰
先生大用終有時

當以斯文施天下豈徒玩書心神疲

聞子規

月上半峯峯樹碧子規啼苦月無色壯士耳邊都不聞
兒女眼中淚自滴古人出處非關身處今事親出事君
服勤至死不敢倦避勞擇逸豈所聞我看蜀道誠為難
嗟爾子規何云云王尊九折竟叱馭班超萬里圖立勲
乘危蹈險盡臣節二人至今揚清芬我本魯國一男子
少小氣志凌浮雲精誠許國貫白日有心致主為華勲

位卑身賤難自達滿腹帝典與皇墳有時憤懣吐一言
小人謗議已紛紛宰相寬容天子慈八年之中三從軍
從軍官清吾何苦嘉州路遠爾勿語地不為我易其險
我豈守道不能固子規子規漫啼絕斷無清淚灑向汝

蝦蟆

夏雨下數尺流水滿池泓蝦蟆為得時晝夜鳴不停幾
日飽欲死腹圓如瓶罌鉅吻自開闔頭項或縮盈時於
土坎間突出兩眼睛是何癡形骸能吐惡音聲嗟哉爾

肉膾不中為犧牲嗟哉爾聲麤不中和人情殊不自量
力更欲睥睨橫海之鱣鯨自謂天地間獨馳善鳴名萬
物聒皆聾不知鐘鼓欽欽雷霆閔閔應龍戢腦入海底
鳳凰舉翼摩青冥此時各默默以避蝦蟇鳴何時雨歇
水澤涸青臭泥中露醜形失水無能為兩脚不解行乾
渴以至死盡把枯殼填土坑

訪田公不遇

主人何處去門外草萋萋獨犬睡不吠幽禽閒自啼老

猿偷果實稚子弄鋤犁日暮園林悄春風吹藥畦

蘇唐詢秀才晚學於予告歸以四韻勉之

憐我山中卧半年相伴吟道傳諸子後易得數爻深爨
或經年絕書猶竟日尋惜哉未終業親老忽霑襟

歲晏村居

歲晏有餘糧盃盤氣味長天寒雨脚落春近臙頭香菜
色青仍短茶芽嫩復黃此中得深趣真不羨膏粱

送奉符縣監酒稅孟執中借職

東西兩處各天涯去國還鄉喜又嗟
鄒嶧山藏孟子宅海棠花落蜀王家
深知周道非彝酒可罪唐臣乞稅茶
三載此心無一事聞經絳帳日常斜

寄元均

君為儒者豈知兵何事欣隨壁馬行
裴度樽前坐韓愈趙成帳下立荀卿
禦戎誰道全無策對壘寧防下一枰
須信乾坤養不肖年三十七卧柴荆

赴任嘉州初登棧道寄題姜潛至之讀易堂

我不辭官君下第其間險易兩何如連雲棧外四千里
讀易堂中一帙書慈母含飴垂禿髮先生懷道接茅廬
莫將青淚頻頻灑蜀道之難欲上初

士廷評相會梓州

道視苟揚雖未至分如管鮑已知深一千二百日離別
五十六驛外相尋重欲同君注周易且來共我聽胡琴
月留屋角不下去似與清風憐苦吟

留題敏夫隱居

幾迴到此尋逋客
杯案蕭疎滋味長
山飯半甌椽子熟
春蔬一筋朮苗香
四時泉石應無夏
滿谷雲霞別是鄉
終待共君結鄰里
竹間相並兩間房

訪竹溪呈孟節兼有懷熙道

到頭泉石是吾家
坐石聽泉日已斜
一片青衫非富貴
千竿綠竹是生涯
君曾覽照頭皆雪
我試看書眼亦花
便好結為山伴侶
教他夔益佐勲華

村居

幽居一畝枕溪稜
階下杉松纏古藤
常愛園林深似隱
不嫌門戶冷如僧
麥宜過社猶催種
山近經秋却懶登
已把壯心閒頓置
少年休用苦相憎

送馮司理之任彭州

李白詩中蜀道難
把詩試讀淚沅瀾
江形詰曲千迴折
嶺路峻嶒萬屈盤
登陟去年腰僅折
追思今日鼻猶酸
此行君不同屯蹇
五馬相知舊長官

赴任嘉州待闕左
綿七十日通判呂
國博日相從

吟酌至嘉陽因成韻寄之

鼎來豈敢道能詩一見何因便解頤
鄉國三千里離別杯盤七十日相知
送人江外馬馱妓垂釣寺中魚竭池
別後中秋又重九與誰賞月詠東籬

燕枝板浣花箋寄合州徐文職方

合州太守鬢將絲聞說歡情尚不衰
板與歌娘拍新調牋供狎客寫芳辭
木成文理差差動花映溪光瑟瑟奇
名得只從嘉郡樹樣傳仍自薛濤時
奇章磊磊馳聲價

江令翩翩落酒卮幾首詩成卷魚子誰人唱罷泣燕枝
紅牙管好同牀置紫竹笙宜一處施願助風流向樽席
杏花況是未離披

夏竦

附

江州人性敏好學以文章名世舉賢良方正累遷
右正言知制誥坐事出知黃州仁宗即位徙洪州
竦材術過人急於進取喜交結任智數傾側反覆
時論目為奸邪依中人張懷德得復原官遂改參
知政事未幾罷知襄州及范仲淹與富弼同心輔
政而太子中允石介撰慶厯聖德詩以美之語頗
侵竦竦銜怨刺骨又欲傾陷弼等乃使婦女陰習
石介書偽作奏記上弼責以行伊霍之事復冒為

廢立詔云出介手代弼屬草者用飛語上聞致弼
與仲淹不安其位先後請外介亦通判濮州疎恨
介不已及介死言其北走敵國請發棺檢勘
會大臣力爭之乃止其奸詭忤忍類如此云

應廷試

殿上衮衣明日月硯中旗影動龍蛇縱橫禮樂三千字
獨對丹墀日未斜

海雁橋

海雁橋邊春水深畧無塵土到花陰忘機不問人知否
自有沙鷗信此心

觀藏珠

敏手機心頗自安
遮藏有路巧千般
主公當面無由見
只怕旁人冷眼看

宋元詩會卷九

欽定四庫全書

宋元詩會卷十

兵部主事陳焯編

歐陽修

字永叔廬陵人四歲而孤母鄭以荻畫地觀誨之
學敏悟過人及冠嶷然有聲宋興百年而文體猶
仍五季修遊隨得古本韓文苦志力學遂以文章
名天下舉進士試南宮第一擢甲科調西京推官
入朝為館閣校勘范仲淹之貶修貽書責司諫高
若訥坐貶夷陵令久之復校勘進集賢校理慶歷
三年知諫院時正人在位僉小忌之目為朋黨修
為帝分別言之撰朋黨論以進同修起居注遂知

轉詔詔奉使河東還以龍圖閣直學士為河北都
轉運使會杜衍等以黨議罷去上疏力爭亦出知
滁州徙揚州潁州復學士留守南京丁母憂服闋
召判流內銓遷翰林學士俾修唐書使朔方其國
為之加禮知嘉祐二年貢舉知開封府改羣牧使
拜禮部侍郎兼侍讀學士建議立儲五年任樞密
副使六年參知政事與韓琦同心輔政英宗立太
后垂簾左右交構幾成嫌隙賴修等調護兩宮以
安漢議起修引喪服記謂為人後者為其父母降
期服而不沒父母之名朝論抵牾惟蔣之奇與修
意合薦為御史眾以姦邪目之奇之奇患之用薛
宗孺誣修惟薄不根之語上章劾修神宗詰問由
來皆詞窮坐黜修亦力求退罷以刑部尚書知毫
州年六十即乞休加太子少師致仕卒謚文忠

贈杜默

南山有鳴鳳其音和且清鳴於有道國出則天下平杜
默東土秀能吟鳳凰聲作詩幾百篇長歌仍短行攜之
入京邑欲使衆耳驚來時上師堂再拜辭先生先生領
首遣教以勿驕矜贈之三豪篇而我濫一名杜子來訪
我欲求相和鳴顧我文字卑未足當豪英豈如子之辭
鏗鏘間鏞笙淫哇俗所樂百鳥徒嚶嚶杜子卷舌去歸
衫翩以輕京東聚羣盜河北黠新兵饑荒與愁苦道路
日以盈子盍引其吭發聲通下情上聞天子聰次使宰

相聽何必九包

一作苞

禽始能瑞

一作薦

堯庭子詩何時作

我耳久已傾願以白玉琴寓之朱絲繩

水吞夜行寄子美聖俞

寒

一作晨

雞號荒林山壁月倒挂披衣起視夜攬轡念行

邁我來夏云初素節今已屆高河瀉長空勢落九州外

微風動涼襟曉氣清餘睡緬懷京師友文

一作有

酒邈

一作作

邀高會其間蘇與梅二子可畏愛篇章富縱橫聲價相

磨

一作摩

蓋子美氣良雄萬竅號一噫有時肆顛狂醉墨

灑霏霈譬

一作勢

如千里馬已發不可殺盈前盡珠璣一

一難束汰梅翁事清切石齒漱寒瀨作詩三十年視我

猶後輩文詞愈清新心意雖

一作難

老大譬如妖韶女老

自有餘態近詩尤古硬

一作淡

咀嚼苦難噉初如食橄欖

真味久愈在蘇豪以氣轢

一作燥

舉世徒驚駭梅窮獨我

知古貨今難賣二子雙鳳凰百鳥之嘉瑞雲烟一翱翔

羽翮一摧鍛安得相從遊終日鳴噦噦問胡苦思之對

酒把新蟹

暮春有感

幽憂無以銷春日靜愈長熏風入花骨花枝互低昂往
來採花蜂清蜜未滿房春事已爛熳落英漸飄揚蛺蝶
無所為飛飛助其忙啼鳥亦屢變新音巧調篴遊絲最
無事百尺拖晴光天工施造化萬物感春陽我獨不如
春久病卧空堂時節去莫挽浩歌自成傷

按六書無
熳字古歌

曰卿雲爛兮糾縵縵兮縵訓素縵亦
無大義而唐詩多用爛熳不知何本

讀徂徠集

徂徠魯東山石子居山阿魯人之所瞻子與山嵯峨今
子其死矣東山復誰過精魂已埋沒文章豈能磨壽命
雖不長所得固已多舊藁偶自錄滄溟之一螺其餘誰
付與散失存幾何存之警後世古鑑照妖魔子生誠多
難憂患靡不罹音羅宦學三十年六經老研摩問胡所專
心仁義立與軻揚雄韓愈氏此外豈知他尤勇攻佛老
奮筆如揮戈不量敵衆寡膽大身么麼往年遭母喪泣
血走岷峨垢面跣雙足鉏犁事田坡至今鄉里化孝弟

勤蠶禾昨者來太學青衫踏朝靴陳詩頌聖德厥聲續
猗那羔雁聘黃晞晞驚走鄰家施為可怪駭世俗安委
蛇謗口由此起中之若飛梭上賴天子聖不挂網者羅
憶在太學年大雪如翻波生徒日盈門饑坐列雁鵝絃
誦貼鄰里唐虞賡詠歌常續最高第騫游各名科豈止
學者師謂宜國之端夭壽反仁鄙誰尸此偏頗不知詆
訛者又忍加詆訶聖賢要久遠毀譽暫諠譁生為舉世
疾死也一作古人嗟作詩遺魯社祠子以為歌

重讀徂徠集

我欲哭石子夜開徂徠編開編未及讀涕泗已漣漣勉
盡三四章收淚輒忻歡切切善惡戒丁寧仁義言如聞
子談論疑子立我前乃知長在世誰謂已

一作子

沈泉昔

也人事乖相從常苦艱今而每思子開卷子在顏我欲
貴子文刻以金玉聯金可燦而銷玉可碎非堅不若書

一作傳

以紙六經皆紙傳但當書百本傳百以為千或落

於四荒或藏在深山待彼謗焰熄放此光芒縣人生一

世中長短無百年無窮在其後萬世在其先得長多幾
何得短未足憐惟彼不可朽名聲文行然讒誣不須辨
亦止百年間百年後來者憎愛不相緣公議然後出自
然見媿妍孔孟困一生毀逐遭百端後世苟不公至今
無聖賢所以忠義士恃此死不難當子病方革謗辭正
騰喧衆人皆欲殺聖主獨保全已埋猶不信僅免斲其
棺此事古未有每思輒長歎我欲犯衆怒為子記此冤
下紆冥冥忿仰叫昭昭天書於蒼翠石立彼崔嵬巔詢

求子世家恨子兒女頑經歲不見報有辭未能詮

一作銓

忽開子遺文使我心已寬子道自能久吾言豈須鐫

讀書

吾生本寒儒老尚把書卷眼力雖已疲心意殊未倦正

經首唐虞偽說起秦漢篇章異句讀解詁及箋傳是非

自相攻去取在勇斷初如雨軍

一作兵

交乘勝方

一作多

酣

戰當其旗鼓催不覺人馬汗至哉天下樂終日在几

一作作

書

案念昔始從師力學希仕宦豈敢取聲名惟期脫貧

賤忘食日已晡然薪夜侵旦謂言得志

一作意

後便可焚

筆硯少償辛苦時惟事寢與飯歲月不我留一生今過
半中間嘗忝竊內外職文翰官榮日清近廩給亦豐美
人情慎所習酖毒比安宴漸追時俗流稍稍學營辦盃
盤窮水陸賓客羅俊彥自從中年來人事攻百箭非惟
職有憂亦自老可歎形骸苦衰病心志亦退愼前時可
喜事閉眼不欲見惟尋舊讀書簡編多朽斷古人重溫
故官事幸有閒乃知讀書勤其樂固無限少而干祿利

老用忘憂患又知物貴久至寶見百鍊紛華暫時好俯
仰浮雲散淡泊味愈長始終殊不變何時乞殘骸萬一
免罪譴買書載舟歸築室一作屋潁水岸平生頗論誼
次加點竄庶幾垂後世不然死芻豢信哉蠹書魚韓子
語非訕

讀梅氏詩有感示徐生

子美忽已死聖俞舍吾南嗟吾譬馳車而失左右驂勅
敵嘗壓壘羸兵當戒嚴凡人貴勉強惰逸易安恬吾既

苦多病交朋復凋殲篇章久不作意思如膠粘良田失
時耕草莽廢鋤芟美井不日汲何由發清甘偶開梅此
篇不覺日挂簷乃知文字樂愈久益無厭吾嘗哀世人
聲利競爭貪哇咬聒兩耳死不享韶咸而幸知此樂又
常深討探今官得閒散舍此欲奚耽頑庸雖警策賴子
發其箝

聖俞惠宣州筆戲書

聖俞宣城人能使紫毫筆宣人諸葛高世業守不失緊

心縛長毫三副頗精密硬軟適人手百管不差一京師
諸筆工牌榜自稱述累累相國東比若衣縫蟲或柔多
虛尖或硬不可屈但能裝管榻有表曾無實價高仍費
錢用不過數日豈如宣城毫耐久仍可乞

送胡學知湖州

武平天下才四十滯鉛槧忽乘使君舟歸榜一作不可

纜都門春漸動柳色綠將暗挂帆千里風水濶江艷艷
吳興水精宮樓閣在寒檻橘柚秋芭繁烏程春菰釅清

談越客醉屢舞吳娘豔寄詩毋憚頻

一作煩

以慰離居念

大熱

二首

四時成萬物寒暑迭鈞陶壯陽當用事大夏炎蒸歆造
化本無情怨咨徒爾勞身微天地濶四顧無由逃九門
閶闔開萬仞崑崙高積雪寒凜凜清風吹寥寥嗟我雖
欲往而身無羽毛

陽暉燦四野萬里纖雲收羲和因路遠正午當空留枝
條不動影草木皆含愁深林虎不嘯卧喘如吳牛蜩蟬

一何微嗟爾徒啾啾

感興

唧唧復唧唧夜歎曉未息蟲聲急愈尖病耳聞若刺壯
士易為老良時最難得日月相隨東天行自南北三者
不相謀萬古無窮極安知人世間歲月忽已易

內押刺
韻音戚

折刑部海棠戲贈聖俞

搖搖牆頭花豔豔爭青娥朝見開尚少暮看繁已多不
惜花開繁所惜時節過昨日枝上紅今日隨流波物理

固如此去一作古來知奈何達人但飲酒壯士徒悲歌

夜聞風聲有感奉呈原父舍人聖俞直講

夜半羣動息有風生樹端颯然飄我衣起坐為長歎苦暑君勿厭初涼君勿歡暑在物猶盛涼歸歲將寒清霜忽已飛零露亦漙漙霜露本無情豈肯私蕙蘭不獨草

木爾君形安得完櫛髮變新白鑑容消

一作無

故丹風埃

共一作苦

侵迫心志亦摧殘萬古一飛隼兩曜雙跳丸擾

擾賢與愚流沙逐驚湍其來固如此獨久知誠難服食

為藥誤此言真不刊但當飲美酒何必被輕紉

風雨三日不出呈聖俞

少年喜追隨老大厭諠譁慙愧二三子邀我行看花花
開豈不好時節亦云嘉因病既不飲衆歡獨成一作我嗟

管絃暫過耳風雨愁還家三日不出門推枕類寒鴉妻
兒強我飲飮餽果與瓜濁酒傾殘壺枯魚雜乾蝦小婢
立我前赤脚兩髻丫軋軋鳴雙絃正如觴嘔啞坐令江
湖心浩蕩思無涯寵祿不知報鬢毛今已華有田清潁

間尚可事桑麻安得一黃犢幅巾駕柴車

寄題劉著作義叟家園效聖俞體

嘉子治新園乃在太行谷山高地苦寒當樹所宜木羣
花媚春陽開落一何速凜凜心節竒惟應松與竹母栽
當暑槿寧種深秋菊菊死抱枯枝槿艷隨昏旭黃楊雖
可愛南土氣常燠未知經雪霜果自保其綠顏色苟不
衰始知根性足此外衆草花徒能悅凡目千金買姚黃
慎勿同流俗

感事二首

空山一道士辛苦學延齡一旦隨物化反言仙已成開
墳見空棺謂已超青冥尸一作解如蛇蟬換骨脫其形
既云須變化何不任死生

仙境不可到誰知仙有無或乘九斑虬或駕五雲車朝
倚扶桑枝暮遊崑崙墟往來幾萬里誰復遇諸涂富貴
不還鄉安事富貴歟神仙不可見魑魅與為徒人生不
免死魂魄入幽都仙者得長生又云超太虛等為不在

世與鬼亦何殊得仙猶若此何況不得乎寄謝山人
辛勤亦何愚

行次葉縣

朝渡汝河流暮宿楚山曲城陰日下寒野氣春深綠征
車倦長道故國有喬木行行漸樂郊東風滿平陸

絳守居園池

嘗聞紹述絳守居偶來覽登周四隅異哉樊子怪可吁
心欲獨出無古初窮荒控幽入有無一語詰曲百盤紆

孰云已出不剽襲句斷欲學盤庚書荒烟古木蔚遺墟

我來嗟祇

一作止

得其餘栢槐端莊偉丈夫蒼顏鬱鬱老

不枯靚容新麗亦何姝清池翠蓋擁紅蕖孤翯虎搏豈

足道記錄細碎何區區虞氏八卦畫河圖禹湯臯虺

一作

陶

梁唐虞豈不古奧萬世模嫉世姣巧

一作好

習卑汙以

奇矯薄駭羣愚用此猶得追韓徒我思其人為躊躇作
詩聊詭為坐娛

洛陽牡丹圖

洛陽地脉花最宜牡丹尤為天下奇我昔所記數十種

於今十年半忘之開圖若見古人面其間數種昔未窺

客言

一作云

近歲花特異往往變出呈新枝洛人驚誇立

名字買種不復論家貲比新較舊難

一作莫

優劣爭先擅

價各一時當時絕品可數者魏紅窈窕姚黃妃壽安細

葉開尚少

一作蚤

朱砂玉板人

一作猶

未知傳聞千葉昔未

有只從左紫名初馳四十年間花百變最後最好潛溪

緋今花雖新我未識未信與舊誰妍媸當時

一作年

所見

已云絕豈有更好

一作妍

此可疑古稱天下無正色但恐

世好隨時移靸紅鶴翎豈不美斂色如避新來姬何況

遠說蘇與賀有類異世誇嬌施造化無情宜一槩偏此

著意何其私又疑人心愈巧偽天

一作名

欲鬪巧窮精微

不然元化朴散久豈特近歲成澆漓爭新

一作先

鬪麗若

不已更後百載知何為但應新花日愈好惟有我老年

年衰

贈無為軍李道士

二首

無為道士三尺琴中有萬古無窮音音如石上瀉流水
瀉之不竭由源深彈雖在指聲在意聽不以耳而以心
心意既得形骸忘不覺天地白日愁雲陰

李師琴紋

一作形

如卧蛇一彈使我三咨嗟五音商羽上

肅殺颯颯坐上風吹沙忽然黃鐘回暖律當冬草木皆
萌芽郡齋日午公事退荒涼樹石相交加李師一彈鳳
皇聲空山百鳥停嘔啞我怪李師年七十面目明秀光
如霞問胡以然笑語我慎勿辛苦求丹砂惟當養其根

自然耀其華又云理身如理琴正聲不可干以邪我聽
其言未云足野鶴何事還思家抱琴揖我出門去獵獵
歸袖風中斜

和劉原父澄心紙

君不見曼卿子美真奇才久已零落埋黃埃子美生窮
死愈貴殘章斷藁如瓊瑰曼卿醉題紅粉壁壁粉已剝
昏烟煤河傾崑崙勢曲折雪壓大華高崔嵬自從二子
相繼沒山川氣象皆低摧君家雖有澄心紙有敢下筆

知誰哉宣州詩翁餓

一作餓

欲死黃鵠折翼鳴聲哀有時

得飽好言語似聽高唱傾金壘二子雖死此翁在老手

尚能工剪裁奈何不寄反示我如棄正論求誹詆嗟我

今衰不復昔空能把卷闔且開百年干戈流戰血一國

歌舞今荒臺當時百物盡精好往往遺棄淪蒿萊君從

何處得此紙純堅瑩膩卷百枚官曹職事喜閒暇臺閣

唱和相追陪文章自古世不乏閒出安知無後來

答聖俞

人皆喜詩翁有酒誰肯一醉之嗟我獨無酒數往從一

作

就翁何所為君居南方我北走世路離合安可期汴渠

千艘日上下來及水門猶未知五年不見勞夢寐三日

始往何其遲城東鰈河有名字萬家棄水為汙池人居

其上苟賢者我視此水猶連漪入門下馬解衣帶共坐

習習春風吹濕薪熒熒煮薄茗四顧壁立空無遺萬錢

方丈飽則止一瓢飲水樂無涯況出新詩數十首珠璣

大小光陸離他人欲一不可有

一作得

君家筐篚滿莫持

才大一作多名高乃富貴豈比金紫包愚癡貴賤同為一

丘土聖賢獨如星日垂道德內樂不假物猶一作須朋

友并良時蟬聲漸已變秋意得酒安問醇與醕玉堂官

閒無事業親舊幸可從其私與翁老矣會有幾當棄百

事勤追隨

思白兔雜言戲答公儀憶鶴之作

君家白鶴白雪毛我家白兔白玉毫誰將贈兩翁謂此

二物皎潔勝瓊瑤已憐野性易馴擾復愛仙格何孤高

玉兔四蹄不解舞不如霜鶴能清嘒低垂兩翅趁節拍
婆娑弄影誇嬌嬈兩翁念此二物者久不見之心甚勞
京師少年殊好尚意氣橫出爭雄豪清尊美酒不輒飲
千金爭買紅顏韶莫令少年聞我語笑我乖僻遭譏嘲
或被偷開兩家籠縱此二物令逍遙兔奔滄海却入明
月窟鶴飛玉山千仞直上青松巢索然兩衰翁何以慰
無繆纖腰綠鬢既非老者事玉山滄海一去何由招

於劉功曹家見楊直講

衰

女奴彈琵琶戲作呈聖

俞

大絃聲遲小絃促十歲嬌兒彈啄木啄木不啄新生枝
惟啄槎牙枯樹腹花繁蔽日銷空園樹老參天杳深谷
不見啄木鳥但聞啄木聲春風和暖百鳥語山路磽确
行人行啄木飛從何處來花間葉底時丁丁林空山靜
啄愈響行人舉頭飛鳥驚嬌兒身小指撥硬功曹廳冷
絃索鳴繁聲急節傾四坐為爾飲盡黃金觥揚君好雅
心不俗太學官卑飯脫粟嬌兒兩幅青布裙三脚木牀

坐調曲竒書古畫不論價盛以錦囊裝玉軸披頭掩卷
有時倦卧聽琵琶仰看屋客來呼兒旋梳洗滿額花鈿
貼黃菊雖然可愛眉目秀無奈長饑頭頸縮宛陵詩翁
莫笑渠人生自足乃為娛此兒此曲翁家無

鳴鳩

天將陰鳴鳩逐婦鳴中林鳩婦怒啼無好音天雨止鳩
呼婦歸鳴且喜婦不亟歸呼不已逐之其去恨不蚤呼
不肯來固其理吾老病骨知陰晴每愁天陰聞此聲日

長思睡不可得遭爾賄賂何時停衆鳥笑鳴鳩爾拙固
無匹不能娶巧婦以共營家室寄巢生子四散飛一身
有婦長相失夫婦之恩重太山背恩棄義須臾間心非
無情不得已物有至拙誠可憐君不見人心百態巧且
姦臨危利害兩相關朝為親戚暮仇敵自古常嗟交道
難

鬼車

嘉祐六年秋九月二十有八日天愁無光月不出浮雲

蔽天衆星沒舉手向空如漆抹天昏地黑有一物不見
其形但聞其聲其初切切淒淒或高或低乍似玉女調
玉笙衆管參差而不齊既而吽吽呦呦若軋若抽又如
百兩江州車回輪轉軸聲啞嘔鳴機夜織錦江上羣雁
驚起蘆花洲吾謂此何聲初莫窮端由老婢撲燈呼兒
曹云此怪鳥無匹儔其名爲鬼車夜載百鬼凌空遊其
聲雖小身甚大翅如車輪排十頭凡鳥有一口其聲已
啾啾此鳥十頭有十口口挿一舌連一一作十一作喉一口出

一聲十聲百響更相酬昔時周公居東周厭聞此鳥憎
若讐夜呼庭氏率其屬彎弧俾逐出九州射之三發不
能中天遣天狗從空投自從狗啣一頭落斷頸至今清
血流爾來相距三千秋晝藏夜出如鵠鷗每逢陰黑天
外過乍見火光驚輒墮有時餘血下點汚所遭之家家
必破我聞此語驚且疑反祝疾飛無我禍我思天地何
茫茫百物巨細理莫詳吉凶在人不在物一蛇兩足反
為祥却呼老婢炷燈火捲簾開戶清華堂須臾雲散衆

星出夜靜皎月流清光

感二子

黃河一千年一清岐山鳴鳳不再鳴自從蘇梅二子死
天地寂然收雷聲百蟲壞戶不啟蟄萬木逢春不發萌
豈無百鳥解言語喧啾終日無人聽二子精思極掇抉
天地鬼神無遁情及其放筆騁豪俊筆下萬物生光榮
古人謂此覩天巧命短疑為天公憎昔時李杜爭橫行
麒麟鳳凰世所驚二物非能致太平須時太平然後生

開元天寶物盛極自此中原疲戰爭英雄白骨化黃土
富貴何止浮雲輕唯有文章爛日星氣凌山岳常崢嶸
賢愚自古皆共盡突兀空留後世名

送張屯田歸洛歌

昔年洛浦見花落曾作悲歌歌落花愁來欲遣何可奈
時向金河尋杜家杜家花雖非絕品猶可開顏為之飲
少年意氣易成懽醉不還家伴花寢一來京國兩傷春
憔悴窮愁九陌塵紅芳紫荅處處有騎馬欲尋無故人

黃河三月入隨河河水多時悵望多為憐此水來何處
中有伊流與洛波忽聞君至自西京洗眼相看眼暫明
心衰面老畏人問驚我瘦骨清如水今年七月妹喪夫
稚兒孀女啼呱呱季秋九月子喪婦十月厭厭成病軀
端居移病新城下日不出門無過者獨行時欲彊高歌
一曲未終雙涕洒可憐明月與春風歲歲年年事不同
暫別已嗟非舊態再來應是作衰翁感時惜別情無已
無酒送君空有淚西歸必有問君人為道別來今若此

答謝景山遺古瓦硯歌

火數四百炎靈銷誰其代者當塗高窮姦極酷不易取
始知文景基局牢坐揮長喙咏天下豪傑競起如蝟毛
董呂僉汜相繼死紹術權備爭咆哮力彊者勝怯者敗
豈較才德為功勞然猶到手不敢取而使螟蝗生蝮蝮
子丕當初不自恥敢謂舜禹傳之堯得之以此失亦此
誰知五馬食一槽當其盛時爭意氣叱咤雷電生風飈
干戈戰罷數功閔周蔑方召堯無臯英雄致酒奉高會

巍然銅雀高岩岩，圓歌宛轉激清微。
妙舞左右回纖腰，一朝西陵看拱木。
寂寞總帳空蕭蕭，當時淒涼已可歎。
而況後世悲前朝，高臺已傾漸平地。
此瓦一墜埋蓬蒿，苔文半滅荒土蝕。
戰血曾經野火燒，敗皮敝網各有用。
誰使鐫鑱成凸凹，景山筆力若干弩。
句道語老能揮毫，嗟予奪得何所用。
簿領朱墨徒紛淆，走官南北未嘗捨。
緹襲三四勤緘包，有時屬思欲飛洒。
意緒軋軋難抽綵，舟行屢備一作被水神奪。
往往冥晦遭風濤，質頑物久有

精怪常恐變化生靈妖名都所至必傳玩愛之不換魯
寶刀長歌送我怪且偉欲報慚愧無瓊瑤

答朱宋捕蝗詩

捕蝗之術世所非欲究此語興於誰或云豐凶歲有數
天孽未可人力支或言蝗多不易捕驅民入野踐其畦
因之姦吏恣貪擾戶到頭斂無一遺災蝗食苗民自若
吏虐民苗皆被之吾嗟此語祇知一不究其本論其皮
驅雖不盡勝養患昔人固已決不疑秉蠹投火況舊法

古之去惡猶如斯既多而捕誠未易其失安在常由遲
誅誅最說子孫衆為腹所孕多蛄蚘始生朝畝暮已頃
化一為百無根涯口含鋒刀疾風雨毒腸不滿疑常饑
高原下隰不知數進退整若隨金輦嗟茲羽孽物共惡
不知造化其誰尸大凡萬事悉如此禍當早絕防其微
蠅頭出土不易捕羽翼已就功難施只驚羣飛自天下
不究生子由山陂官書立法空太峻吏愚畏罰反自欺
蓋藏十不敢申一上心雖惻何由知不如寬法擇良令

告蝗不隱捕以時今苗因捕雖踐死明歲猶免為蜾蠃
吾嘗捕蝗見其事較以利害曾深思官錢二十買一斗
示以明信民爭馳歛微成衆在人力頃刻露積如京坻
乃知孽蟲雖甚衆嫉惡苟銳無難為往時姚崇用此議
誠哉賢相得所宜因吟君贈廣其說為我持之告採詩

日本刀歌

昆夷道遠不復通世傳切玉誰能窮寶刀近出日本國
越賈得之滄海東魚皮裝貼香木鞘黃白間雜鋤與銅

百金傳入好事手佩服可以禳妖凶傳聞其國居大島
土壤沃饒風俗好其先徐福詐秦民採藥淹留壯童老
百工五種與之居至今玩器皆精巧前朝貢獻屢往來
士人往往工詞藻徐福行時書未焚逸書百篇今尚存
令嚴不許傳中國舉世無人識古文先王大典藏絕域
蒼波浩蕩無通津令人感激坐流涕鏽澁短刀何足云

奉使道中寄坦師

道人少賈海上遊海舶破散身沉浮黃金滿篋人所寄

吹簫偶得還中州羸身歸金不受報祇取斗酒相獻酬
歡娛慈母終一世脫去妻子藏巖幽蒼煙寥寥池水漫
白玉菡萏吹高秋夜燃栢子煮山藥憶此東望無時休
塞垣春枯積雪溜沙礫威怒黃雲愁五更匹馬隨雁起
想見鄖郭花今稠百年夸奪終一丘世上滿眼真悠悠
寄聲萬里心綢繆莫道異趣無相求

葛氏鼎

大河昔決東南流蕭條東郡今遺湫我從故老問其由

云古五鼎藏高丘地靈川秀草木稠鬱鬱佳氣蒸常浮
惟物伏見數有周祕藏竒怪神所控天昏地慘鬼哭幽
至寶欲出風雲秋蕩搖山川失維陬九龍大戰驅蛟虬

剗然岸裂轟雲

一作雷

鷗滑人夜驚鳥嘲啁婦走抱兒扶

白頭蒼生仰叫黃屋憂聚徒百萬如虻蚍千金一掃隨
浮漚天旋海沸動九州此鼎始出人間留滑人得之不
敢收竒模古質非今侔器大難用識者不以示世俗遭
擲擲明堂會朝饗諸侯饗官百品供王羞調以五味烹

全牛時有用捨吾無求二三子學雕琳球見之始驚中
歎愀披荒斲古爭窮蒐苦語難出聲呶嗶馬圖出河龜
一作龍
負疇自古恠說何悠悠嗟我老矣不能休勉彊作

詩慙效尤

綠竹堂獨飲

夏簟解籜陰加交卧齋公退無喧囂清和況復值佳月
翠樹好鳥鳴咬咬芳樽有酒美可酌胡為欲飲先長謠
人生暫別客秦楚尚欲泣淚相攀邀況茲一訣乃永已

獨使幽夢恨蓬蒿憶予驅馬別家去去時陌陌東風高
楚鄉留滯一千里歸來落盡李與桃殘花不共一日看
東風吹哭聲嗷嗷洛地不見青春色白楊但有風蕭蕭
姚黃魏紫開次第不覺成恨俱零凋榴花最晚今又折
紅綠點綴如裙腰年芳轉新物轉好逝者日與生期遙
予生本是少年氣磋磨牙角爭雄豪馬遷班固泊歆向
下筆點竄皆嘲嘈客來共坐說今古紛紛落盡玉塵毛
彎弓或擬射石虎又欲醉斬荆江蛟自言剛氣貯心腹

何爾柔軟為脂膏吾聞莊生善齊物平日吐論竒牙聲
憂從中來不自遣強叩瓦缶何說說伊人達者尚乃爾
情之所鍾況吾曹愁填胸中若山積雖欲強飲如沃焦
乃判自苦英壯氣不有此恨如何消又聞浮屠說生死
滅沒謂若夢幻泡前有萬古後萬世其中一世猶刀螳
安得獨灑一榻淚欲助河水增滔滔古來此事無可奈
不如飲此罇中醪

雪

新陽力微初破萼客陰用壯猶相薄朝寒稜稜風莫犯
暮雪緜緜止還作馳驅風雲初慘淡炫晃山川漸開廓
光芒可愛初日照潤澤終為和氣爍美人高堂晨起驚
幽士虛窻靜聞落酒壚成徑集鉗罟獵騎尋蹤得狐貉
龍蛇掃處斷復續猊虎團成呀且攫共貪終歲飽麴麥
豈惜空林饑鳥雀沙墀朝賀迷象笏桑野行歌沒芒屨
乃知一雪萬人喜顧我不飲胡為樂坐看天地絕氛埃
使我胷襟如洗滌脫遺前言笑塵雜搜索萬象窺冥漠

頽雖陋邦文士衆巨筆人人把矛槩自非我為發其端
凍口何由開一噓

黃牛峽祠

大川雖有神淫祀亦其俗石馬繫祠門山鷗噪叢木潭
潭村鼓隔溪聞楚巫歌舞送迎神畫船百丈山前路上
灘下峽長來去江水東流不暫停黃牛千古長如故峽
山侵天起青嶂崖崩路絕無由上黃牛不下江頭飲行
人惟向舟中望朝朝暮暮見黃牛徒使行人過此愁山

高更遠望猶見不是黃牛滯客舟

語曰朝見黃牛暮見黃牛一朝一暮黃牛

故如

千葉紅梨花

峽州署中舊有此花

紅梨千葉愛者誰白髮郎官心好奇徘徊繞樹不忍折
一日千匝看無時夷陵寂寞千山裏地遠氣偏時節異
愁烟苦霧少芳菲野卉蠻花鬪紅紫可憐此樹生此處
高枝絕一作紅豔無人顧春風吹落復吹開山鳥飛來自
飛去根盤樹老幾經春真賞今纔遇使君風輕絳雪罽

前舞日暖繁香露下聞從來奇物產天涯安得移根植
帝家猶勝張騫為漢使辛勤西域徙榴花

黃牛峽以
徵古諺紅

梨花以廣異聞
其詩可勿論也

希真堂東手種菊花十月始開

當春種花唯恐遲我獨種菊君勿謂春枝滿園爛張錦
風雨須臾落顛倒看多易厭情不專鬪紫誇紅隨俗好
豁然高秋天地肅百物衰零一作陵誰暇弔君看金蕊正
芬敷曉日浮霜相照耀煌煌正色秀可餐藹藹清香寒

愈峭高人避喧守幽獨淑女靜容修

一作羞

窈窕方當搖

落看轉佳慰我寂寥何以報時攜一罇相就飲如得貧
交論久要我從多難壯心衰迹與世人殊靜躁種花勿

一作不

種兒女花老大安能逐年少

贈沈博士歌

遵

沈夫子胡為醉翁吟醉翁豈能知爾琴滁山高絕滁水
深空巖悲風夜吹林山溜白玉縣青岑一瀉萬仞源莫
尋醉翁每來喜登臨醉倒石上遺其簪雲荒石老歲月

侵子有三尺徽黃金寫我幽思窮崎嶇自言愛此萬仞
水謂是太古之遺音泉淙石亂到不平指下嗚咽悲人
心時時弄餘聲言語軟滑如春禽嗟乎沈夫子爾琴誠
工彈且止我昔被謫居滁山名雖為翁實少年坐中醉
客誰最賢杜彬琵琶皮作絃自從彬死世莫傳玉練鎖
東坡詩云新客從翻
玉連鎖練疑當作連聲入黃泉死生聚散日零落耳冷
心衰翁索莫國恩未報慙祿厚世事多虞嗟力薄顏推
鬢改真一翁心以一作已憂醉安知樂沈夫子謂我翁言

何苦悲人生百年間飲酒能幾時攬衣推琴起視夜仰
見河漢西南移

樂哉襄陽人送劉太尉從廣

一作景元

赴襄陽

嗟爾樂哉襄陽人萬屋連甍清漢濱語言輕清微帶秦
南通交廣西峨岷羅穀纖麗藥物珍枇杷柑橘薦清罇
磊落金盤爛璘璘槎頭縮項昔所聞黃橙擣蘼香復辛
春雷動地竹走根錦苞玉筍味爭新鳳林花發南山春
掩映谷口藏山門樓臺金碧瓦鱗鱗峴首高亭倚浮雲

漢水如大瀉，沅沅斜陽返。照白鳥羣，兩岸桑柘雜耕耘。
文王遺化已寂寞，千載誰復思其仁。荊州漢魏以來重，
古今相望多名臣。嗟爾樂哉襄陽人，道扶白髮抱幼孫。
遠迎劉侯朱兩輪，劉侯年少氣甚淳。詩書學問若寒士，
罇俎談笑多嘉賓。往時邢沼一作臺有善政，至今遺愛留。
其民誰能持我詩，以徃為我先。賀襄陽人。

謝觀文王尚書惠西京牡丹

舉正

京師輕薄兒，意氣多豪俠。爭誇朱顏事，一作競年少肯慰。

白髮將花插尚書好事

一作士

與俗殊憐我霜毛苦蕭颯

贈以洛陽花滿盤鬪麗爭奇紅紫雜兩京相去五百里

幾日馳來足何捷紫檀金粉香未吐綠萼紅苞露猶浥

謂我嘗為洛陽客頗向此花曾涉獵憶昔進士初登科

始事相公沿吏牒河南官屬盡賢俊洛城池

一作苑

藥相

連接我時年纔二十餘每到花開如蛺蝶姚黃魏紫腰

帶鞋潑墨齊頭藏綠葉鶴翎添色又其次此外雖妍猶

婢妾爾來不覺三十年歲月纔如熟羊脾無情草木不

改色多難人生自摧拉見花了了雖舊識感物依依幾
投睫念昔逢花必沽酒起坐騅呼屢傾榼而今得酒復
何為愛花繞之空百匝心衰力懶一作乏難勉強與昔一
何殊勇怯感公意厚不知報墨筆淋漓口徒囁

嘗新茶呈聖俞

建安三千里京師三月嘗新茶人情好先務取勝百物
貴蚤相矜誇年窮臘盡春欲動蟄雷未起驅龍蛇夜聞
擊鼓滿山谷千人助叫聲喊呀萬木寒癡睡不醒惟有

此樹先萌芽乃知此為最靈物宜其獨得天地之英華
終朝採摘不盈掬通犀銙小圓復窈鄙哉穀雨槍與旗
多不足貴如刈麻建安太守急寄我香弱包裹封題斜
臬甘器潔天色好坐中揀擇客亦嘉新香嫩色如始造
不似來遠從天涯停匙側盞試水路拭目向空看乳花
可憐俗夫把金錠一作挺一作鋌
茶錄多用挺字猛火炙背如蝦蟇由
來真物有真賞坐逢詩老頻咨嗟須臾共起索酒飲何
異秦雅終淫哇

洗兒歌

為聖俞作

月暈五色如虹蜺
深山猛虎夜生兒
虎兒可愛光陸離
開眼已有百步威
詩翁雖老神骨秀
想見嬌嬰目與眉
木星之精為紫氣
照山生玉水生犀
兒一作此翁不比他

兒翁三十年名天下
知材高位下衆所
惜天與此兒聊
慰之翁家洗兒衆
人喜不惜金錢散
問一作鄰里宛陵他

日見高門車馬煌
煌梅氏子

奉答原父見過寵示之作

不作流水聲行將二十年吾生少賤足憂患憶昔有罪
初南遷飛帆洞庭入白浪墮淚三峽聽流泉援琴寫得
入此曲聊以自慰窮山間中間永陽亦如此醉臥幽谷
聽潺湲自從還朝戀榮祿不覺鬢髮俱凋殘耳衰聽重
手漸顫自昔指法將誰傳偶欣日色曝書畫試拂塵埃
張斷絃嬌兒癡女繞翁膝爭欲彊翁聊一彈紫微閣老
適我過愛我指下聲泠然戲一作語君此是伯牙曲自古
常歎知音難君雖不能琴能得琴一作其意斯為賢自非

樂道甘寂寞誰肯顧我相留連興闌東帶索馬去却鎖
塵匣包青氈

會飲聖俞家有作兼呈原父景仁聖從

憶昨九日訪君時正見階前兩叢菊愛之欲繞行百匝
庭下不能容我足折花却坐時嗅之已醉還家手猶馥
今朝我復到君家兩菊階前猶對東枯莖槁葉苦風霜
無復滿叢金間綠京師誰家不種花碧砌朱欄敞華屋
奈何來對兩枯株共坐窮簷何局促詩翁文字發天葩

豈比青紅凡草木凡草開花數日間天葩無根長在目
遂令我每飲君家不覺長餅臥牆曲坐中年少皆賢豪
莫怪我今雙鬢禿須知朱顏不可恃有酒當歡一作飲且
相屬

雙井茶

西江水清江石老石上生茶如鳳爪窮臘不寒春氣蚤
雙井芽生先百草白毛囊以紅碧紗十斤茶養一兩芽
長安富貴五侯家一啜猶須三日誇寶雲日注非不精

爭新棄舊世人情豈知君子有常德至寶不隨時變易
君不見建溪龍鳳團不改舊時香味色

送龍茶與許道人

潁陽道士青霞客來似浮雲去無蹟夜朝北斗太清


一作

虛壇不道姓名人不識我有龍團古蒼壁九龍泉深一
百尺憑君汲井試烹之不是人間香味色

戲石唐山隱者

石唐仙室紫雲深潁陽真人此算心真人已去升寥廓

歲歲巖花自開落我昔曾為洛陽客偶向巖前坐磐石
四字丹書萬仞崖神清之洞鎖樓臺雲深路絕無人到
鸞鶴今應待我來



宋元詩會卷十